



Inatsisartuni ilaasortaq Naaja H. Nathanielsen, Inuit Ataqatigiit

§ 37 naapertorlugu apeqqummut 2014-199-imut Sajupillatsitsisarluni misissuinernut tunngasumut akissuteqaat

2. januar 2015
Sagsnr. 2014-098245
Dok. Nr.

Grønlandshavet-imi sajupillatsitsisarluni suliaqarnerit pillugit, TSG-p 2014-imi ingerlataannut akuersissuteqarnermut tassungalu tapiliussamut tunngasumik Inatsisartut suleriaasianni § 37 imm. 1 naapertorlugu, makkuningga Naalakkersuisunut apeqquteqarputit.

Postboks 1601
3900 Nuuk
Tlf. (+299) 34 50 00
Fax (+299) 32 56 00
E-mail: mlsa@nanoq.gl
www.nanoq.gl

1) AG-mi allaatigisami allassimavoq TGS-ip qinnuteqaatini kingusissuklut nassiussimagaa "taamaasineranilu Namminersorlutik Oqartussat killissarititaasa ilaat" qaangersimagaa. Killissarititaq suna pineqarpa aammalu sooq qinnuteqaat Namminersorlutik Oqartussanit suliarineqarpa, naak siusinnerusuklut § 37 naapertorlugu apeqquteqarninni tusagassiutinut tapersiisummut atatillugu uannut akissummi (nr. 154 aamma 162) Naalakkersuisut oqaaseqartut piffissatigut killigititaasut malinneqartarnissaat assut pingaartinneqartoq? Matumani qinnuteqaat piffissamik killigititaasumik sutigut qaangiisimanersoq Naalakkersuisut paasisutisseeqquneqarput?

Akissut:

Sajupillatsitsisarluni suliaqarnissanut qinnuteqaatit "BMP Guidelines for application, execution and reporting of offshore hydrocarbon exploration activities (excluding drilling) in Greenland" (Guidelines) malillugit suliarineqartarput.

Guidelines-imi immikkoortoq 2.2-mut naapertuuttumik ingerlatseqatigiiffik Kalaallit Nunaata imartaani ingerlatanik suliaqarnissamut akuersissuteqarnissamik qinnuteqaateqartoq, Scope of Project-imi taaneqartartumik kingusinnerpaamik 1. februar nassiussisussaasarpoq. TGS Grønlandshavet-imi ingerlataminut Scope of Project-imi Aatsitassanut Ikummatissanullu Aqutsisoqarfimmu e-mail-ikkut ulloq 31. januar 2014 nassiussivoq, taamaallunilu taassuma tunniunnissaanut piffissaliussa eqquutsillugu.

Scope of Project nassiunneqartoq tunngavigalugu Aatsitassanut suliaqarfimmi Avatangiisinut Aqutsisoqarfiup avatangiisinut sulianut siunnersortasut suleqatigalugit naliliivoq, ingerlatseqatigiiffik 2014-imi Grønlandshavet-imi ingerlatassaminut Avatangiisinut sunniutaasussanik nalilersuinnermut (VVM) nassuiaammik suliaqassasoq. VVM-ip taassuma tunniunnissaanut piffissaliussa, Guidelines-imi immikkoortoq 2.3 naapertorlugu tassaavoq ulloq 1. marts. TGS-ip ingerlatassanut qinnuteqaatigineqartunut VVM ulloq 28.

februar 2014 nassiuppaa, taamaalillunilu immikkoortoq 2.3-imi piffissaliussaq nassuiarneqartoq eqquutsillugu.

2) AG-mi allaatigisaq naapertorlugu tusarniaasitsinermi killigititaq tassaavoq 18. august, akuersissullu 26. august tunniunneqarpoq. Ullut taakkua akunneranni sapaatip akunneranik piffissaqarlutik TGS-kkut qanoq ingerlasoqarsimaneranut isorineqarnermut akissummik nassuiaasioqquneqarput. Nassuiaammi pineqartut qassit TGS-imit akeqquneqarpat? Apeqqutit ulloq suna TGS-imut nassiunneqarpat, nassuiaasiarlulooq suna Namminersorlutik Oqartussanit tiguneqarpa?

Akissut:

Ingerlatassanut qinnuteqaatigineqartunut VVM-ip tamanut ammasumik tusarniaassutigineqarneranut atatillugu, tusarniaaffigineqartut 7-it tusarniaanermut akissuteqaateqarput. Tusarniaanermut akissuteqaatit 7-it taakkua katillugit sammisanik 87-inik, tamarmik itisiliiffiusumik nalunaarusiami allaaserineqartunik, imaqarput. Tusarniaanermut akissuteqaatit 7-it taakkua tassaapput:

DCE-mit aamma Pinngortitaleriffimmit tusarniaanermut akissuteqaat ulloq 15. juli 2014 Aatsitassanut Ikummatissanullu Aqutsisoqarfiup tiguaa. Tusarniaanermut akissuteqaat ulloq taanna tusarniaanermut nittartakkami tamanut ammasumik saqqummiunneqarpoq. Tusarniaanermut akissuteqaat ulloq 4. august 2014 TGS-mut nassiunneqarpoq.

Kalaallit Nunaanni Aalisartut Piniartullu Kattuffiannit (KNAPK) tusarniaanermut akissuteqaat ulloq 23. juli 2014 Aatsitassanut Ikummatissanullu Aqutsisoqarfiup tiguaa. Suliaassanik suliarinnittartup tusarniaanermut akissuteqaat ulloq 25. juli 2014 tiguaa. Sapaatip akunnerata naalernerani tiguneqarnera pissutigalugu tusarniaanermut akissuteqaat ulloq 29. juli 2014 tamanut ammasumik saqqummiunneqarpoq. Ulloq 4. august 2014 tusarniaanermut akissuteqaat TGS-mut nassiunneqarpoq.

Kalaallit Nunaanni Aalisarnermut Nakkutilliisoqarfimmit tusarniaanermut akissuteqaat ulloq 25. juli 2014 Aatsitassanut Ikummatissanullu Aqutsisoqarfiup tiguaa. Sapaatip akunnerata naalernerani tiguneqarnera pissutigalugu tusarniaanermut akissuteqaat ulloq 29. juli 2014 tamanut ammasumik saqqummiunneqarpoq. Ulloq 4. august 2014 tusarniaanermut akissuteqaat TGS-mut nassiunneqarpoq.

Avatangiisinut Pinngortitamullu Naalackersuisoqarfimmit tusarniaanermut akissuteqaat ulloq 11. august 2014 Aatsitassanut Ikummatissanullu Aqutsisoqarfiup tiguaa. Tusarniaanermut akissuteqaat ulloq 14. august 2014 tamanut ammasumik saqqummiunneqarpoq. Ulloq 14. august 2014 tusarniaanermut akissuteqaat TGS-mut nassiunneqarpoq.

Kommuneqarfik Sermersuup ulloq 15. august 2014 tusarniaanermut akissuteqaat mailadresse-mut kukkusumut nassiuppaa. Sapaatip akunnerata naalernerani matoqqaneq pissutaalluni ulloq 18. august 2014 tusarniaanermut akissuteqaat Aatsitassanut Ikummatissanullu Aqutsisoqarfiup tiguaa. Ulloq 18. august 2014 tusarniaanermut akissuteqaat tamanut ammasumik saqqummiunneqarpoq. Ulloq 18. august 2014 tusarniaanermut akissuteqaat TGS-mut nassiunneqarpoq.

Greenpeace-mit tusarniaanermut akissuteqaat ulloq 18. august 2014 Aatsitassanut Ikummatissanullu Aqutsisoqarfiup tiguua. Ulloq taanna tusarniaanermut akissuteqaat tamanut ammasumik saqqummiunneqarpoq. Ulloq 18. august 2014 tusarniaanermut akissuteqaat TGS-mut nassiunneqarpoq.

KANUKOKA-mit tusarniaanermut akissuteqaat ulloq 18. august 2014 Aatsitassanut Ikummatissanullu Aqutsisoqarfiup tiguua. Ulloq taanna tusarniaanermut akissuteqaat tamanut ammasumik saqqummiunneqarpoq aammalu ulloq taanna tusarniaanermut akissuteqaat TGS-mut nassiunneqarluni.

TGS-ip itisiliiffiusumik nalunaarusiaq piumasaqaatigineqartoq tuluttuunngorlugu e-mail-ikkut Aatsitassanut Ikummatissanullu Aqutsisoqarfimmut ulloq 20. august 2014 nassiuppa. Ulloq 21. august 2014 taamatuttaaq TGS-ip itisiliiffiusumik nalunaarusiaq kalaallisuunngortitaq piumasaqaatigineqartoq Aatsitassanut Ikummatissanullu Aqutsisoqarfimmut nassiuppa.

3) Qanga Namminersorlutik Oqartussat TGS-imiit 400 meterisut akunnilinnik sajuppillatsitsinialuni titarnileerusunnernik tigusaqaqaarpat? AG naapertorlugu Namminersorlutik Oqartussat qinnuteqaat 29. augustimi tiguat. 29. august tikitsinnagu tassunga tunngasumik saaffiginnittoqarpa? Aammalu 26. august, tassa akuersissutip siulliup tunniunneqarfia, nallertinnagu tamanna pillugu saaffiginnittoqarpa?

Akissut:

Saaffiginnissut siulleq Aatsitassanut Ikummatissanullu Aqutsisoqarfiup TGS-mit tigusaa VVM-imi nassuiaatinut tunngatillugu titarnerit ungasissusissaasa annikillisinnissaannut tunngassuteqartoq ulloq 29. august 2014-imeersuuvoq.

Taamaalluni titarnerit ungasissusissaasa 1-2 km-inut annikillisinneqarnissaat pillugu pisortatigoortumik qinnuteqaat siullermeertumik ulloq 29. august 2014 Aatsitassanut Ikummatissanullu Aqutsisoqarfiup tiguua. Tamatuma kingorna ungasissusissat minnerpaamik 400 meterinut annikillisinneqarnissaasa periarfissaqarnera pillugu TGS ulloq 2. september apeqquteqarpoq.

3a) Paasissutissat tigussaasut suut tunngavigalugit umiarsuup misissuisup sajuppillatsitsilluni misissuinini akuersissummik peqqaartinnani aallartissimangikkai Naalackersuisut uppernarsarsinnaavaat?

Akissut:

Naalackersuisut VVM-imut ingerlatassanullu tassunga atasunut akuersissuteqarnissaat sioqqullugu TSG misissuinerminik aallartitsinngilaq. Piffissami tassani TGS ulluni 6-ini Kalaallit Nunaata avannaata avataata imartaaniippoq, katersinermik ingerlatassaminik aallartitsinani.

Umiarsuup piffissamut pineqartumut tassunga angalaffinnut allattuiffii malillugit allassimavoq, atortunik piareersaasimasut aammalu taakkua suliaqarnernik aallartitsinissamut piareersimaniarlutik imaanut inississimagaat. Atortut tassaanerupput kabeli 6 km-isut takissuseqartoq umiarsuarmut kalinneqarluni puttasoq. Paasissutissanik

sajupillatsitsisarluni katersissagaanni sammivimmi ataatsimi narlumuinnartunik ingiaqatigiissunilu arlalinni, aammalu sammivimmut allamut sanimut akimorlugit narlumuinnartunik ingiaqatigiissunilu arlalinni umiarsuaq ingerlaartussaasarpoq.

Aamma – umiarsuup angalaarfiinut allattuiffiit saniatigut – satellit-ikkut paasissutissani arlalinni takuneqarsinnaavoq, umiarsuaq sajupillatsitsisartussaq ukiuunerani kaaviiarluni ingerlaarsimasoq aammalu akuersissuteqarnerup nassiunneqareernerata kingorna katersinermik aallartitsisimasoq – najukkami nalunaaqutaq malillugu 03.46 eqqorlugu ulloq 27. august 2014. Umiarsuup ingerlaarfiinut allattuiffiit aamma satellit-ikkut paasissutissat tamatumunnga uppersisitsinissamut Aatsitassanut Ikummatissanullu Aqutsisoqarfimmut nassiunneqarput.

4) TGS-ip akuersissumminik annertusaanissamut qinnuteqaataa ullut sisamat atorlugit Namminersorlutik Oqartussanit suliarineqarpoq. Taakkunannga ullut marluk sapaatip akunnerata naaneraniipput. Ullut taakkua sisamat atorlugit Aatsitassanut Aqutsisoqarfimmiit Avatangiisinut Aqutsisoqarfik aamma DCE attavigineqarput. DCE-p imaluunniit Avatangiisinut Aqutsisoqarfiup akuersissutip annertusinissaanut tunngatillugu TNG-mut akerlilliissuteqannginnerat ilumoorpa? Ullut taakkua sisamat ingerlaneranni nutaamik tusarniaasitsinissaq eqqarsaatinut ilaasimanerpa?

Akissut:

Aatsitassanut Ikummatissanullu Aqutsisoqarfiup ulloq 29. august 2014 titarnerit ungasissusissaasa imminnut qaninnerunissaannik qinnuteqaat tigummagu, taanna ulloq taanna Aatsitassanut suliassaqarfimmi Avatangiisinut Aqutsisoqarfimmut nassiunneqarpoq, taassumalu DCE aamma Pinngortitaleriffik aatsitassanut ikummatissanullu inatsimmi malittarisassanut naapertuutumik oqaloqatigai.

Arlaannaannulluunniit attuumassuteqanngitsumik ilisimatusarnikkut siunnersortit naliliinerannut naapertuutumik Avatangiisinut Aqutsisoqarfik ulloq 2. september 2014 nalilivoq, "closed areas"-imik taaneqartartup iluani titarnerit imminnut ungasissusissaat 10 km-iniit annikinnerussanngitsut. Taassuma avataani titarnerit imminnut ungasissusissaat annikinnerusinnaavoq, taamaattumik "closed areas"-inik taaneqartartut avataanni 1-2 km-inik ingerlaarfissaliinissamik ingerlatseqatigiiffiup qinnuteqaataa akuerineqarsinnaasoq Avatangiisinut Aqutsisoqarfiup akueralugu.

TGS tamatuma kingorna ulloq 2. september 2014 apeqquteqarpoq "closed areas" avataanni titarnerit imminnut ungasissusissaat 400 meterinik minnerpaamik ungasissuseqartussanngorlugit annikillisinneqarsinnaanersut.

Aatsitassanut Ikummatissanullu Aqutsisoqarfik tamatuma kingorna ulloq taanna TGS-mut ingerlatassanut akuersissuteqarnermik tunniussivoq, tassani allassimalluni "closed areas" avataanni imaani sumiiffinni minnerpaamik 400 meterinik titarneri imminnut ungasissuseqartillugit sajupillatsitsisarluni suliagarnermut pisussanut pilersaarummik ingerlatseqatigiiffik aaqqiisuussinissamut akuerineqartoq.

Aatsitassanut Ikummatissanullu Aqutsisoqarfiup titarnerit ungasissusissaasa minnerpaamik 400 meterinissaat pillugu atugassarititaasuni piumasaqaataa, Aqutsisoqarfiup

ingerlatseqatigiiffimmik oqaloqateqareernerani aammalu taassuma Avatangiisinut Aqutsisoqarfiup aalajangiineranut killissaliussat iluaniinnera paasillugu, ilanngunneqarpoq.

Titarnerit ungasissusissaasa minnerpaamik 400 meteriunissaannik atugassarititaasuni piunasaqaataasoq, ingerlatseqatigiiffiup titarnerit imminnut qaninnerunissaannik qinnuteqaataata siulliup suliarineqarnerani immikkut ilaatinneqanngimmat, - VVM-imi akuersissuteqarfigineqartumi suliassap nassuiarneqarneranut naleqqiullugu titarnerit ingerlaartinnerisa qaninnerutinneqarneri avatangiisinut sunniuteqassasoq naatsorsuutigineqarsinnaanersoq – Avatangiisinut Aqutsisoqarfiup titarnerit ingerlatinneqarnissaannik nutaamik naliliinissaq suliniutigaa.

Tamatuminnga eqikkaalluni naliliineq tassaavoq, sumiiffinni pisinnaatitsissuteqarfigineqartuni titarnerit akornanni ungasissutsit imminut qaninneranni ingerlatat tamarmiusut (tassalu km-it ingerlaarfigineqartut amerlassusaat) annertusineqanngimmata, naliliisoqartoq titarnerit akornanni 400 meterinik ungasissuseqartitsilluni sajuppillatsitsisaruni misissuinerit avatangiisinut sunniinissaat, misissuinissamit pilersaarutigineqaaqqaartumit, VVM-imut nassuiaammi nassuiarneqartumit, allaanerussuteqassanngitsaq.

Qinnuteqaat Naalackersuisut akuersissuteqarfigissanngilaat, pissutigalugu ingerlatat avatangiisinut sunniinnaanerit VVM-imut akuersissuteqarfigineqareersumut killissaliussat iluanniittoq naliliisoqarmat. Suliaqarnermi pisussanut pilersaarut Addendum-imi akuersissuteqarfigineqartumi takuneqarsinnaasoq, suliaqarnermi pisussanut pilersaarummut, VVM-imik akuersissuteqarnermut tunngaviummut, teknikkikkut iluarsinertut isigineqarpoq. Suliaqarnermi pisussanut pilersaarut akuersissuteqarfigineqartoq, pisussanut pilersaarutitut annertusineqartutut isigineqanngilaq, pissutigalugu titarnerit kilometerit amerlassusissaat amerlineqanngimmata.

Matuma siuliani taaneqartut tunngavigalugit nutaamik tusarniaanermik aallartitsinissaq naleqquttutut isigineqanngilaq.

5) Aatsitassanut Aqutsisoqarfiup Aatsitassanut imaluunniit Avatangiisinut Naalackersuisut akuutinnagit allaffissornerinnakkut akuersissutip annertusineqarnissaa isumagisimagunarpaa. AG-mi allaatigisaq naapertorlugu Namminersorlutik Oqartussanit oqaatigineqarpoq annertusaaneq teknikkikkut aaqqiinerinnaasoq avatangiisinut sunniuteqanngitsaq. TGS-p akuersissutaani siullermi titarnerit 3 km-rinik akuttussuseqartussaapput, akuersissummi nutaami 400 meterinik akuttussuseqarsinnaatitaalersut.

Akuttussutsit annikinnerpaaffissaannut ilisimatusaatit qanoq inassuteqarpat, aammalu arfeqarfiit illersugaaffiginaat imaluunniit taakkua avataaniinnersoq apeqqutaatillugu akuttussutsit inissinneqartarpat? Avatangiisinut biologiskimillu illersorneqarsinnaasut eqqarsaatigalugit Naalackersuisut isumaat naapertorlugit akulikinnerpaaffissaq suua?

Akissut:

Ingeriussinerit akornanni minnerpaamik akuttussusissanut, tassalu titarnerit ingeriussiffigineqartut akornanni ungasissusissat, ilisimatusarnikkut suut inassutigineqarnersut erseqqissumik akineqarsinnaanngilaq.

Titarnerit ungasissusaat avatangiisinut sunniinernut aalajangiisuulluinnartumik pingaaruteqartoq naatsorsuutigineqanngilaq. Pingaaruteqarnerpaaq tassaavoq sajuppillatsitsisarlu misissuineq sumi aamma qaqugu ingerlanneqassanersoq, qanoq sivistigissanersoq aammalu sumiiffik qanoq annertutigisoq nipiliornerit sunnerneqassanersoq. Tassa assersuutigalugu imaappoq, piffissaq sajuppillatsitsisarlu misissuiffiusussa aalajangersimasumut inissinneqarsimappat, titarnerit imminnut qanittumik inissinneqarneranni sumiiffik sunnerneqartussa annikinnerusinnaassaaq.

Arfinnut sumiiffiit illersuiffiusut iluanni imaluunniit avataanni titarnerit sajuppillatsitsiffiusussat akornanni ungasissusissat ilisimatusarnikkut inassutigineqartut assigiinngissuteqarnersut pillugu oqaatigineqassaaq, sumiiffinni illersuiffiusussani titarnerit ungasissusissaat kisimik isiginiarneqartussaannimmata. Guidelines-ini oqaatigineqartuni allasimavoq, sumiiffimmi illersuiffiusussami misissuisoqassappat ilaatigut immikkut nalilersuinissaq immikkut mianerinninnissamik qulakkeerisussa ingerlanneqartariaqartoq, ilaatigullu taanna "killilimmik annertussuseqassasoq", tassanilu ilaalluni titarnerit ikittut naatsullu minnerpaamik 10 km-isut imminnut ungasissuseqassasut.

Taamaalliluni minnerpaamik ungasissusissat suut avatangiisitigut uumassusilinnullu isumannaatsuunersut erseqqissumik akineqarsinnaanngilaq, pissutigalugu ilaatigut tamatumunnga sumiiffiit piffissallu immikkuullarissut, sajuppillatsitsisarlu misissuinerimik ingerlatsiviusussat, kiisalu misissuinerup annertussusaa, apeqqutaasussaammata.

Sajuppillatsitsilluni misissuineranut atatillugu akuersissutitoqqaniit annertusaanissani allannguutinut tunngatillugu tusarniaasitsisoqaqqittariaqalinnginnerni allannguutissat qanoq annertutigisinnaanerannik Naalakkersuisut qanoq isumaqarpat?

Akissut:

Apeqqut erseqqissumik akineqarsinnaanngilaq. Qinnuteqaammi suliami nalilersuineq aalajangersimasooq ingerlanneqartussaavoq. TGS-ip qinnuteqaataanut 29. august 2014-imeersumut tunngatillugu naliiisoqarpoq, ingerlatassamik akuersissuteqarfigineqareersumik teknikkikkut allannguuteqartitsineq, VVM-imi akuersissuteqarfigineqartumi nassuiaatinut ilaatinneqartunut naleqqiullugu, ingerlataqarnermi avatangiisinik sunniinissamik allannguisussatut naliliiffigineqanngitsoq, tassani pineqartoq.

TGS-ip misissuinerinik sivituisoqartussaannginnera imaluunniit annertusititsisoqartussaannginnera tassani pineqarmat, tassunga atatillugu pingaaruteqarpoq, tassami naliiisoqarpoq suliaqarnermut pisussanut pilersaarummi allannguuteqartitsineq VVM-imut akuersissuteqarfigineqartumut killissaliussat aammalu tassani titarnerit kilometerit annerpaamik 7000-inik amerlassuseqassasut nassuiaatit iluanniittoq.

5a) AG-mi allaaserisamittaaq oqaatigineqarpoq, sajuppillatsitsinerit 400 meterisut akuttussuseqarnissaannik aalajangiineq allaffissornikkut pisimasooq. Qanoq

annertutigisunik – qanorlu – sajuppillatsitsilluni misissuinerni akuersissutit allannguuteqarnissaannut allaffissorneq Naalakkersuisuniit pisinnaatinneqarpa?

Akissut:

Ingerlatassamut akuersissuteqarfigineqarsimasumut tunngatillugu, allannguinnissamik assigisaanilluunniit qinnuteqaateqartoqartillugu, suliasamik suliarinninnerup ilaatut nalinginnaasumik, qinnuteqaatigineqartoq Naalakkersuisunit akuersissuteqarnermut tunniunneqareersumut killissaliussat iluaniinnersoq, imaluunniit suliasaq Naalakkersuisunut saqqummiunneqassanersoq, allaffissornikkut pitsaassutsimik kinaassusersiunngitsumillu naliliinermi ilaatinneqartarpoq. Pisumi aalajangersimasumi naliliisoqarpoq Naalakkersuisut qinnuteqaatigineqartoq isummerfigissanngikkaat aammalu akuersissuteqarfigissanngikkaat, pissutigalugu ingerlatassaq VVM-imut akuersissuteqarfigineqareersumut killissaliussat iluaniittoq naliliisoqarmat. Suliaqarnermut pisussanut pilersaarut Addendum-imi akuersissuteqarfigineqartumi allassimasoq, VVM-imi akuersissuteqarfigineqartumi nassuiarneqartutut suliaqarnermi pisussanut pilersaarummik teknikkikkut iluarsiinertut isigineqarpoq. Suliaqarnermi pisussanut pilersaarut akuersissuteqarfigineqartoq pisussanut pilersaarummik annertusitiitsisutut isigineqanngilaq.

Naalakkersuisut naliliinerat malillugu suleriaaseq periaaserlu nalinginnaasooq tassani atornerqarpoq, tassani Aatsitassanut oqartussaasooq ingerlatassanut VVM-ip Naalakkersuisunit akuersissuteqarfigineqartup iluaniittunut allannguuteqartitsinissaq teknikkimut tunngassuteqartoq pillugu qinnuteqaatinik suliarinnittuusarluni.

6)

Ilumoorpa TGS-ip sajuppillatsitsilluni misissuinernut akuersissutaa arferit illersorneqarnissaanni zonep ilaaniittoq? Aappiuppat: Zonet illersorneqarfiusut iluini titarnerit 10 kilometerisut akunneqarnissaannik inassuteqarneq eqqarsaatigalugu tamanna qanoq ililluni illersorneqarsinnaava, massa akuersissummi pineqartumi 400 meterinik akuttussusiliinissaq pisinnaatinneqartoq?

Akissut:

Naamik, TGS-mut sajuppillatsitsisarluni misissuinissamut akuersissummi arfernut illersuinermut killeqarfissat ilai ilaatinneqanngillat.

Suliaqarnissamut pisussanut pilersaarummi aalajangersimasumi sumiiffinni illersuiiffiusussani, ingerlatseqatigiiffimmit ingerlataminik aaqquissuussinermi maleqquneqartuni, sajuppillatsitsisarnermik ingerlataqarnissaq ilaatinneqanngilaq.

Inussiarnersumik inuulluaqqusillunga


Andreas Uldum

INUIT ATAQATIGIIT

INATSISARTUNI



29.12.2014

Inatsisartut Suleriaasianni § 37 naapertorlugu Naalakkersuisunut imaattunik apeqquteqar-punga.

Apeqqutit:

1)

AG-mi allaatigisami allassimavoq TGS-ip qinnuteqaatini kingusissukkut nassiussimagaa "taamaasineranilu Namminersorlutik Oqartussat killissarititaasa ilaat" qaangersimagaa. Killissarititaq suna pineqarpa aammalu sooq qinnuteqaat Namminersorlutik Oqartussanit suliarineqarpa, naak siusinnerusukkut § 37 naapertorlugu apeqquteqarninni tusagsiutitut tapersiissummut atatillugu uannut akissummi (nr. 154 aamma 162) Naalakkersuisut oqaaseqartut piffissatigut killigititaasut malinneqartarnissaat assut pingaartinneqartoq? Matumani qinnuteqaat piffissamik killigititaasumik sutigut qaangiisimanersoq Naalakkersuisut paasisutisseeqquneqarput.

2)

AG-mi allaatigisaq naapertorlugu tusarniaasitsinermi killigititaq tassavoq 18. august, akuersissullu 26. august tunniunneqarpoq. Ullut taakkua akunneranni sapaatip akunneranik piffissaqarlutik TGS-kkut qanoq ingerlasoqarsimaneranut isorineqarnermut akissummik nassuiaasioqquneqarput. Nassuiaammi pineqartut qassit TGS-imit akeqquneqarpat? Apeqqutit ulloq suna TGS-imut nassiunneqarpat, nassuiaasiarlu ulloq suna Namminersorlutik Oqartussanit tiguneqarpa?

3)

Qanga Namminersorlutik Oqartussat TGS-imiit 400 meterisut akunnilinik sajuppillatsitsiniarluni titarnileerusunnernik tigusaqaaqqaarpat? AG naapertorlugu Namminersorlutik Oqartussat qinnuteqaat 29. augustimi tiguaat. 29. august tikitsinnagu tassunga tunngasumik saaffiginnittoqarpa? Aammalu 26. august, tassa akuersissutip siulliup tunniunneqarfia, nallertinnagu tamanna pillugu saaffiginnittoqarpa?

3a)

Paasissutissat tigussaasut suut tunngavigalugit umiarsuup misissuisup sajuppillatsitsilluni misissuinini akuersissummik peqqaartinnani aallartissimangikkai Naalakkersuisut uppersarsinnaavaat?

4)

TGS-ip akuersissumminik annertusaanissamut qinnuteqaataa ullut sisamat atorlugit Namminersorlutik Oqartussanit suliarineqarpoq. Taakkunannga ullut marluk sapaatip akunnerata naaneraniipput. Ullut taakkua sisamat atorlugit Aatsitassanut Aqutsisoqarfimmiit Avatangiisinut Aqutsisoqarfik aamma DCE attavigineqarput. DCE-p imaluunniit Avatangiisinut Aqutsisoqarfiup akuersissutip annertusinissaanut tunngatillugu TNG-mut akerliliissuteqannginnerat ilumoorpa? Ullut taakkua sisamat ingerlaneranni nutaamik tusarniaasitsinissaq eqqarsaatinut ilaasimernerpa?

5)

Aatsitassanut Aqutsisoqarfiup Aatsitassanut imaluunniit Avatangiisinut Naalakkersuisut akuutinnagit allaffissornerinnakkut akuersissutip annertusineqarnissaa isumagisimagunarpaa. AG-mi allaatigisaq naapertorlugu Namminersorlutik Oqartussanit oqaatigineqarpoq annertusaaneq teknikkikkut aaqiinerinnaasoq avatangiisinut sunniuteqangitsoq. TGS-p akuersissutaani siullermi titarnerit 3 km-rinik akuttussuseqartussaapput, akuersissummi nutaami 400 meterinik akuttussuseqarsinnaatitallersut.

Akuttussutsit annikinnerpaaffissaannut ilisimatusaatit qanoq inassuteqarpat, aammalu arfeqarfiit illersugaaffigineraat imaluunniit taakkua avataaniinnersoq apeqqutaatillugu akuttussutsit inissineqartarpat? Avatangiisinut biologiskimillu illersorneqarsinnaasut eqqarsaatigalugit Naalakkersuisut isumaat naapertorlugit akulikinnerpaaffissaq suua?

Sajuppillatsitsilluni misissuinernut atatillugu akuersissutitoqqaniit annertusaanissani allannguutitut tunngatillugu tusarniaasitsisoqaqqittariaqalinnginnerni allannguutissat qanoq annertutigisinnaanerannik Naalakkersuisut qanoq isumaqarpat?

5a)

AG-mi allaaserisamittaaq oqaatigineqarpoq, sajuppillatsitsinerit 400 meterisut akuttussuseqarnissaannik aalajangiineq allaffissornikkut pisimasoq. Qanoq annertutigisunik – qanorlu – sajuppillatsitsilluni misissuinerni akuersissutit allannguuteqarnissaannut allaffissorneq Naalakkersuisuniit pisinnaatinneqarpa?

6)

Ilumoorpa TGS-ip sajuppillatsitsilluni misissuinernut akuersissutaa arferit illersorneqarnissaanni zonep ilaaniittoq? Aappiuppat: Zonet illersorneqarfiusut iluini titarnerit 10 kilometerisut akunneqarnissaannik inassuteqarneq eqqarsaatigalugu tamanna qanoq ililluni illersorneqarsinnaava, massa akuersissummi pineqartumi 400 meterinik akuttussusiliinissaq pisinnaatinneqartoq?

(Inatsisartuni ilaasortaq, Naaja H. Nathanielsen)

Tunngavilersuut

Greenpeacep norskit ingerlatseqatigiiffiat, TGS, politiinut tunniussimavaa, tassani ingerlatseqatigiiffik akuersissutitaqanngitsumik sajupillatsitsilluni misissuisimannernik pasisaalluni. Peqatigitillugu, Aatsitassanut Aqutsisoqarfiup akuersissuteqarreennikkut tusarniaasitseqqinnani akuersissut annertusisimammat tamanna Greenpeacep isornartorsiorsimavaa. Aatsitassanut Naalakkersuisup suut tarmik pissusissamissut ingerlasimanerarlugit AG-mi oqaatigivaa.

Pisup soqutiginaatigivaa aqqissuussisimanerup ilumut atuuffissamisut atuunerneranik naliliisinnaagatta, taamatullu pitsanngorsaannissanik pissutissaqarnersugut paasisinnaagatsigu.

Politiit sulinerannut akuliunnissara siunertarinngilara, taamaallaalli Namminersorlutik Oqartussani suliat ingerlaernerannut tunngatillugu.

Ullut qulit qaangiutinnginnerini apeqqutima tamarmiusut akineqarnissaannik kissaateqarpunga.